

գտաւ յայնմ սինհոդոսի. եւ չէ անհաւան, վասն յաճախ դեսպանութեան մերոցս յարեւմուտս: Բայց Յովհաննէս 'ի հաշտութեանն ընդ Լեւոնի՝ յառաջ եւ յետոյ, միամտութեամբ եկաց ընդ նմա եւ կարեւոր սպաս եւ խորհուրդ մատուցանէր:

Ե. Մերժումն թագուհոյն վասն յանցանացն, եւ կին երկրորդ ածել Լեւոնի

Զմի 'ի յոյժ կարեւորաց 'ի գիտութիւն Լեւոնի, այլ 'ի ծանունց եւ յանբարեաց՝ մատոյց յառաջ քան զգահընկեցութիւնն, յամի 1205, զիտացեալ զանգէտս 'ի թագաւորէն, զանգոսնելի ինչ գնացս կենակցի նորին, զոր եւ ծանոյց զանխլակի: Տեսաք 'ի սկզբանն, զի ոչ սրտի ընտրութեամբ՝ այլ քաղաքական տեսութեամբ առեալ էր զնա Լեւոնի 'ի կնութիւն, մինչ այն ինչ հասեալ էր յիշխանութիւն, եւ խիթայր 'ի Բրնձէն Անտիոքայ, եւ խնամութեամբն 'ի չափու ունել զսա խորհէր. այլ ըստ օրինի եւ 'ի պատուի ունէր զկինն, յորմէ մի միայն դուստր յիշի եղեալ նմա. զոր եւ կոչեաց յանուն մօր իւրոյ՝ *Ռիթա*: Ոչ է հարկ ասել ո՛րքան ծանրացասումն եղել Լեւոն 'ի լսելն զանհանդուրժելին. եւ զի հանդերձ բնական իրաւամբքն՝ «էր յոյժ սրտային», ըստ պատմչին, զգիտակս գաղտնեաց կնոջն զմերձաւորս նորա՝ հրամայեաց կորուսանել. եւ զնոյն ինքն զկինն անհաւատարիմ, զոր յայնքան փառս բարձրացուցեալ էր եւ թագաւորութեանն հաղորդեալ, ըստ անարգանացն՝ եւ ինքն անարգօրէն ձեռացակոծ արար. եւ սաստկամահ իսկ լինէր արդեօք եղկելին, եթէ ոչ էր 'ի վերայ հասեալ Կոստանդնի Գունդստապլի՝ քեռի-որդւոյ եւ մտերմի Լեւոնի, որ հազիւ թափեաց զխոշտանգեալն, եւ հրամանաւ թագաւորին արկ յարգելան տոհմիկ մարդկան՝ 'ի բերդն Վահկայ. իսկ զդստրիկն Ռիթա՝ առաքեաց Լեւոն առ մայր իւր՝ տիկնաց տիկինն, սնուցանել եւ դաստիարակել: Սա միայն էր յայնժամ պայազատ Լեւոնի. որ 'ի վաղուց հոգայր եւ տագնապէր վասն ժառանգի թագաւորութեանն, զոր այնքան երկայնամիտ ջանիւ 'ի ձեռս եբեր եւ այնքան բարեձեւութեամբ բարձրացոյց. եւ էր նմա մեծ պակասութիւն սրտի՝ ոչ ունել զաւակ արու, եւ ոչ յոյս ունելոյ յայնպիսի կնոջէ, զոր եւ հեռացոյց 'ի բնակութենէ. այլ ոչ մտաբերեաց առ ժամայն յայլ ամուսնութիւն, որպէս ստգտանէն Կիրակոս, յամենայնի գովանի զնա գտանելով, բայց ոչ յայսմ մասին. իբրու թէ առ տոփանաց թողեալ զառաջին կինն եւ ածեալ երկրորդ. զի եթէ այսպէս ինչ խորհէր նա, վաղու իսկ արարեալ էր՝ յետ յայտնելոյ յանցանաց Անտիոքացի կնոջն. որ հաւանօրէն մեռեալ էր